



4. marts 2010

UPA 2010/141

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit inatsit pillugu Naalakkersuisut allannguutissamik siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaalilluni § 2 Inatsisartut inatsisaanni Kalaallit Nunaanni Inatsisartunut qinersisarneq pillugu inatsisip assinganik aalajangersagaqaleqqullugu.

(Inatsisartunut ilaasortaq Malik Berthelsen, Siumut)

Tunngavilersuut:

Qinersisinnaallunilu qinigassanngortissinnaassagaanni kommunimut – inatsisit ullumi atuuttut naapertorlugit - Nunatsinni qaammatini arfinilinni qinersinissaq sioqqullugu najugaqareersimanissaq piumasagaataavoq.

Piumasagaatip taassuma nunaqqativut nunani allani nunassikkallartariaqartut, soorlu ilinniariartorlutik, immaqaluunniit napparsimanertik tunngavigalugu aallartariaqartut eqqorpai.

Nammineerlunga uanga misiginikuuara, Sisimiuni Kommunimut qinersinermi qinigaasinnaanngitsutut nalilerneqarama, qinersineq sioqqullugu qaammatit pingasut Danmark-miittariaqarsimaga-ma oqaatsinik pikkorissarneq peqqutigalugu.

Inatsisartunullu qinersisarneq pillugu allatut inissisimasoqarpoq. Tunngavimmigut aamma tassani sivikinnerpaamik qaammatini arfinilinni nunatsinni qinersinissaq sioqqullugu najugaqarsimanissaq aallaaviuvoq, taamaattorli § 2 Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31.oktober 1996-imeersoq piumasagaatimut immikkut ittumik periarfissiivoq, inunnut, piffissami nuna qimallugu najugaqartariaqartunut, tassani aamma ilanngunneqarlutik ilinniariartortariaqartut. Tassani piumasagaatitut allaaviuinnarpoq, sulii nutsinnginnerup siuliani ukiuni marlunni sivikinnerpaammik inuit allattorsimaffianni allattorsimasuunissaq.

Taamaattumik nunanut allannut nuuttariaqarsimasunut, qinersinissamut peqataasinnaaneq assigiinngissuteqarpoq, apeqqutaalluni Kommunimut immaqaluunniit Inatsisartunut qinersinermut ilaarusunnersoq.

Assersuutigeriarutsigu Nunarput qimallugu qaffasissumik aningaasarsiornermut inuiaqatigiilerinermulluunniit ilinniariarsimalluni qinersisoqarnissaanut qaammatit 5-maannanngortut angerlaruni Kommunimut qineqqusaarniaraluaruni sooq ukiut 4-it utaqqiseqqinneqassava? Aali Inatsisartunut qinigassanngortinniaruni taanna aporfiginagu qinigassanngortissinnaalluni.

Inatsit taama isikkoqartillugu Nunarput qimallugu ilinniariartortariaqartunut tulluannngitsutut isumaqarfigaara.



SIUMUT INATSISARTUNI ILAASORTAAQ / LANDSTINGSMEDLEM

Taamaattumik siunnersuutigaara aalajangersagaq Kalaallit Nunaanni Inatsisartunut qinersisarneq pillugu Inatsisartut Inatsisaat nr. 9, 31.oktober 1966-imeersumit § 2-mut assingusumik Kommunalbestyrelsimut qinersisarnerit pillugu inatsimmut ilanngussisoqassasoq.

Taamaalilluta Kommunimut Inatsisartunullu qinersisinnaatitaaneq qinigassanngortissinnaanerlu ataqatigiinnerusumik inatsisitigut inissisimalissagaluarput. Imaassinnaanngilarmi Inatsiartunut qinersisinnaalluni qinigaasinnaallunilu pisinnaatitaaffilik kommunimulluunniit taama pisinnaatitaaffeqassanngitsaq.

Inuusuttortatta ilinniagaqarnissaat Inatsisartuni tamatta soqutisalarlutigulu pingaartitarigatsigu neriuppunga siunnersuutigisara ilinniariartortartugut eqqarsaatigalugit ilassilluarneqarumaartoq.



TAKUSSUTISSAQ

Kommunalbestyrelsinut, nunaqarfmi aqutsisunut ilagiillu sinniisaannut qinersisarnerit pillugit Inatsisartut inatsisaat nr. 10, 31. oktober 1996-imeersoq. (Naalisagaq)

“§ 1. Kommunalbestyrelsimut qinersisinnaatitaavoq § 2-mi eqqaaneqartut eqqaassanngikkaanni kinaluunniit folketingimut qinersisinnaanermut ukiussarititaasunik naammatsitsisimasoq aammalu qinersinissaq sioqqullugu sap. akunnerini arfinilinni kommunimi pineqartumi aalajangersimasumik najugaqarsimasoq aammalu

- 1) qallunaatut innuttaassuseqartoq aammalu qinersinissaq sioqqullugu sivikinnerpaamik qaammagini arfinilinni Kalaallit Nunaanni aalajangersimasumik najugaqarsimasoq imaluunniit
- 2) qinersinissaq sioqqullugu sivikinnerpaamik ukiuni pingasuni naalagaaffimmi aamma sivikinnerpaamik qaammagini arfmilinni Kalaallit Nunaanni aalajangersimasumik najugaqarsimasoq.

Imm. 2. Kommunalbestyrelsimut ilaasortaq kinaluunniit kommunalbestyrelsimut ilaasortaanerminut atatillugu nuna tamakkerlugu soqutigisaqaqatigiit kattuffiannut, kommunimi allami angerlarsimaffeqartumi, piffissaq tamaat siulittaasussatut toqqarneqartoq, kommunimi qimatamini taasisinnaatitaavoq. [...]

§ 3. Kinaluunniit qinersisartut allasimaffiannut ilanngunneqarsimatinnani qinersisinnaatitaanngilaq.

§ 4. Kommunalbestyrelsimut qinigaasinnaatitaavoq kinaluunniit § 1 naapertorlugu tassunga qinersisinnaatitaasoq, pineqartoq ukiut kingulliit tallimat ingerlaneranni inaarutaasumik eqqartuussinikkut akiliisitsissutissamilluunniit akuersinikkut pinerluttulerinermi inatsisit tunngavigalugit pineqaatissinneqarsimannikkuni imaluunniit ukiut kingulliit pingasut ingerlaneranni pissutsimut nalinginnaasumik isigineqarnermi kommunalbestyrelsimut ilaasortaanissamut naleqqukkunnaarsitsisumik pinerluttulerinermi inatsisit tunngavigalugit pineqaatissinneqarsimannikkuni. Piffissaliussat taaneqartut ullormit qinersivimmiit atuutissapput.

Imm. 2. Taamaattoq kinaluunniit qinigassanngortissinnaavoq pinerluuteqarsimanermigut pineqaatissinneqarsimanini pissutigalugu qinigaasinnaannginnera pillugu akerliliisoqaraluarpuunniit.”

Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31. oktober 1996-imeersoq (Naalisagaq):

“§ 2. Inuit kinguliini taagorneqartut, Kalaallit Nunaata avataaniikkallartut, taakkulu inooqatitut aapparisaat, sumi najugaqarnissamik piunasaqaatip saniatigut § 1-imi piunasarineqartut naammassisimagunikkut, Inatsisartunut qinersisinnaapput:

- 1) Inuit ilinniagaqarlutik Kalaallit Nunaata avataaniittut.
- 2) Inuit peqqinnissamut tunngasunik pissuteqarlutik Kalaallit Nunaata avataaniittut.
- 3) Inuit Kalaallit Nunaanni qinigaallutik folketingimi ilaasortatut suliaqarnerminnut atatillugu Danmarkimiittut.
- 4) Inuit Namminersornerullutik Oqartussanut sinniisuullutik Kalaallit Nunaata avataaniittut.
- 5) Inuit Kalaallit Nunaata avataaniittut aammalu Kalaallit Nunaannut attuumassuteqarnikkut 1-3-mi taaneqartunut sanilliunneqarsinnaalluinnartut.

Imm. 2. Taamaattoq inuit imm. 1-imi taaneqartut aatsaat nuunnginnerminni sivikinnerpaamik ukiuni marlunni Kalaallit Nunaanni inuit aqvisa nalunaarsorsimaffiini allasimasimagunik qinersi sinnaapput.



SIUMUT INATSISARTUNI ILAASORTAAQ / LANDSTINGSMEDLEM

Imm. 3. Inooqatitut aapparisatut, tak. imm. 1, naatsorsuunneqassapput inuit aallannginnermi aapparisatut inooqatigineqalersimasut.”